



ASSEMBLEA DI  
CORSICA

*Commissione ad hoc in carica  
di a riflessione in giru à e pulitiche  
publiche di a lingua corsa*



**CULLETTIVITÀ DI CORSICA**

**ASSEMBLEA DI CORSICA**

---

**SESSIONE STRASURDINARIA**

**20 E 21 DI MAGHJU**

**BILANCIU DI I TRAVAGLI DI A  
CUMMISSIONE AD HOC IN CARICA  
DI A RIFLESSIONE IN GIRU À E  
PULITICHE PUBLICHE DI A LINGUA  
CORSA**

## **I/ Criazione è primi travaglii di a cummissione ad hoc**

A cummissione hè stata criata in lu 2018 da fà un diagnosticu di e pulitiche pubbliche messe in piazza cù un scopu, fà cresce l'usu di a Lingua Corsa incù a speranza di vede la prestu esse istituzionalizata in tutte e cullettività pubbliche di Corsica è ghjunghje à costruì a cuufficialità indispensabile à a salvezza di u corsu.

A prima riunione s'hè tinuta d'Ottobre, sottu à a Presidenza Jean Guy TALAMONI, Presidente di l'Assemblea di Corsica. A st'occasione hè stata eletta Vannina ANGELINI BURESI, Presidente di ssa cummissione ad'hoc.

Dopu fattu u custattu chì u percentuale di tramandera è l'usu di a lingua in lu solcu familiare era assai debule, una prima fasa di travagliu hè stata cunsacrata à u duminiu di a prima zitellina. S'hè urganizata ssa stonda, ingiru à a quistione di l'amparera è di l'immersione, tenendu à mente i scopi chì sò : d'una parte, fà cresce a tramandera, e di l'altra, dà à i locutori a brama di praticà ssa lingua à u cutidianu.

Partendu da st'elementi, u principiu di tramandera à a prima zitellina hè apparsu necessariu, è cusì sò state decise azzione di modu à migliurà ssa tramandera :

- Addunisce l'attori di u settore di a prima zitellina impegnati ind'è a difusione di u corsu ind'è e strutture d'accolta cum'è e ciucciaghje ;
- Studià esempi di rughjoni for'di Corsica ingagiati ind'a stessa dimarchja. Cusì emu pigliatu cuntattu cù prufeziunali in Paese Bascu cun quelli ci hè pussutu ragiunà è fà un bilanciù da pudè definisce l'ogettivi chì seranu i nostri ;
- Mette in anda una pulitica di « Bagnu linguisticu » ind'è e strutture d'accolta di a prima zitellina cù : una cumunicazione in direzione di e famiglie ; furmazione prufeziunale ; un rinforzu di a prisenza di u corsu ind'è filiere tecniche è prufeziunale per l'amparenti (LP, CAP ecc.)
- Aiutà à a creazione d'arnesi per l'amparera di e mammarelle (U librettu « O Chjù » è le so appiigazione per asempiu).
- Crescita di u bughjettu di CANOPE
- Valutazione sistematica di u livellu in Lingua Corsa di i sculari.
- Pruposta d'una prima à e mammarelle chì s'impegnanu ind'è a messa in opera di u bagnu linguisticu in lu so mistieru
- Pruposta di signaletica in lingua corsa ind'e strutture d'accolta di a prima zitellina.

## **II/ A Riforma Blanquer**

Davant'à l'uffensiva contr'à a nostra lingua ch'ella ripresenta a riforma Blanquer, i travaglii di a cummissiò si sò cuncentrati annant'à i cambiamenti liati à ssa riforma.

Parechje riunioni sò state urganizate annant'à stu sughjettu, è parechji attori di u settore educativu ci anu datu u so parè annant'à sta quistione.

Sti travaglii anu permessu u votu d'una risoluzione à l'Assemblea di Corsica chì dumandava l'apertura di negoziate cù u Minsitru di l'Educatione Naziunale, da pudè definì a piazza di a lingua corsa ind'è u secundariu è in particolare à u basciigliè, ch'ella sia spizialità o uzzione. Ssu puntu particolare integra l'idea forte è u prugettu di creà un quadru normativu specificu per l'educatione in Corsica.

## **III/ A piazza di a Lingua ind'a sucità**

Dopu à parechji mesi d'inattività colp'à a crisa sanitaria, a cummissione hà ripigliatu i so travaglii, iniziendu un ciculu di riunione ingiru à a prublematica di a piazza di a lingua Corsa è la so difusione ind'a nostra sucità.

Cusì, parechji attori di u settore di i medià è l'audiovisivu sò stati invitati per dà u so parè è parlà di e so difficoltà.

A cumissione hà fattu u custatu chì esistenu parechje iniziative, assuciative o d'imprese in stu duminiu è ch'elle ripresentanu un canale di difusione di prima trinca per a lingua corsa for'di scola. Quest'iniziativa sò d'impurtanza in lu quadru di a messa in opera necessaria di a pulitica, di normalisazione di a lingua.

E riunione cù l'attori di u mondu di l'audiovisivu anu fattu risorte chì u prublema di a creazione in lingua Corsa era ligatu à a necessità di fà cresce u numeru di prufeziunali cursofoni di u settore, è rende di più attrattive e pruduzione in lingua Corsa per pruduttori è diffusori.

S'è a cumissione rimarca ch'ella esisti una certa dinamica di creazione è di pruduzione ind'è l'audiovisivu in lingua corsa, a so difusione dipende ella di i canali à dispusizione (Via Stella per a maiò parte) è ci vuleria à truvà è mette in ballu altri mezi di sparghjera chì quelli classici, cum'è piattaforme numeriche o siti internet.

### **Cunclusioni :**

À l'esitu di i so travaglii, a cumissione si rallegra d'avè pussutu fà un travaglione di censu di l'iniziative pubbliche è private, messe in piazza è purtate à prò di a Lingua Corsa, è di vede a crescita di l'imprese è di l'associi in u settore linguisticu.

À l'uccasione di li so travaglii, a cumissìo s'hè resu contu di a necessità di fà sorte a lingua di u quattru propiu « accademicu » è permette à i Corsi d'avè spazii, ancu virtuali, duv'elli pudianu fà usu di a so lingua.

A cumissione torna à ripete a necessità per a lingua Corsa d'esse ricunisciuta è chì a sola via per sta ricuniscenza hè un statutu di cuufficialità.